

上拒諫其漸不小請推問其由申用漑柳濱似傳會希顏之說請亦推之安漢英亦因大臣之言啓達私事請推傳曰希顏斟酌之言非謂拒諫也恐有怨悶欲予詳察也柳濱申用漑亦各有懷必達安漢英聞其論父之事父子之間情義迫切故言之矣非無端而發也何情之有再啓不允○命賜宴經筵官柳洵等三十六人于古東宮前庭賜酒樂一等領事成希顏同知事申用漑啓曰臺諫方論臣等今日參宴未安傳曰今日之事爲經筵官設也雖臺諫論之其無辭焉於是各就位飲懼甚將罷中官將命別賜酒饌仍披一紙傳上教坐中請觀乃御書也其書曰爲人君者可法可戒之事莫過於書予之眇末繼承丕基未知安危之迹卿等力勸詳教使我必知三代之治不勝酬恩今賜酒樂又賜薄物表予區區之意以顯吾尊師重道之意各盡予懷共懼芳節扶醉乃罷於是群臣爭相捧玩傳寫以歸焉仍賜領事以下豹皮鹿皮弓子等物有差傳曰前書欲令承傳色備忘而政丞等觀之矣其各極醉而罷且除謝恩於是政丞以下更迭行酒咸極醉飽至有醉倒者留門乃出○夜一更至四更四方天際微明有氣如火或見或滅命弘文館考其應以啓○甲辰領經筵事柳洵等詣賓廳上箋謝恩傳曰知道